

南無大智文殊師利菩薩



文殊師利般若經

聖妙吉祥真實名經

文殊師利發願經

合刊

財團法人佛陀教育基金會印贈

目次

文殊菩薩聖誕祝儀	3
文殊師利所說摩訶般若波羅密經卷上	7
文殊師利所說摩訶般若波羅密經卷下	32
聖妙吉祥真實名經	56
文殊師利發願經	98

文殊菩薩聖誕祝儀

(四月初四日)

戒定真香 焚起衝天上 弟子虔誠 燕在金鑪放 頃刻紛紜
即徧滿十方 昔日耶輸免難消災障

南無香雲蓋菩薩摩訶薩(三稱)

文殊輔法王 智慧非佛莫量 圓頓教中振玄綱 妙義徹底彰
聞者直下亡情見 達本菩提道場 願如善財沐恩光 究竟證
真常 願如善財沐恩光 究竟證真常

文殊菩薩德難量 久成龍種上法王
因憐眾生迷自性 特輔釋迦振玄綱

為七佛師體莫測

作菩薩母用無方

常住寂光應眾感

萬川一月影咸彰

南無清涼山金色世界

大智文殊師利菩薩

南無妙吉祥菩薩

南無本師釋迦牟尼佛

南無本師釋迦牟尼佛

南無文殊師利菩薩

南無文殊師利菩薩

南無普賢菩薩

南無普賢菩薩

南無彌勒菩薩

南無彌勒菩薩

南無十方菩薩摩訶薩

南無十方菩薩摩訶薩

自皈依佛。當願眾生。體解大道。發無上心。

自皈依法。當願眾生。深入經藏。智慧如海。

自皈依僧。當願眾生。統理大眾。一切無礙。和南聖眾。

五臺山上紫雲開
文殊普賢下山來

身騎綠毛金獅子
腳踏蓮花朵朵開

文殊菩薩讚

甚深智慧難測難思

無邊剎海現金獅

赴感各因時

是諸佛師 神化莫能窺

南無妙吉祥菩薩摩訶薩

摩訶般若波羅蜜

文殊師利所說摩訶般若波羅蜜經卷上

依大正藏第八冊
經數232校訂

梁扶南國三藏曼陀羅仙譯

如是我聞：一時，佛在舍衛國祇樹給孤獨園，與大比丘僧滿足千人，菩薩摩訶薩十千人俱。以大莊嚴而自莊嚴！皆悉已住不退轉地。

其名曰：彌勒菩薩，文殊師利菩薩，無礙辯菩薩，不捨擔菩薩，與如是等大菩薩俱。

文殊師利童真菩薩摩訶薩，明相現時，從其住處來詣佛所，在外而立。

爾時，尊者舍利弗，富樓那彌多羅尼子，大目犍連，摩訶迦葉，摩訶迦旃延，摩訶拘絺羅，如是等諸大聲聞，

各從住處俱詣佛所，在外而立。

佛知眾會皆悉集已。爾時如來從住處出，敷座而坐。告舍利弗：汝今何故，於晨朝時在門外立？

舍利弗白佛言：世尊！文殊師利童真菩薩先已至此，住門外立，我實於後晚來到耳。

爾時世尊問文殊師利：汝實先來到此住處，欲見如來耶？

文殊師利即白佛言：如是！世尊！我實來此欲見如來。何以故？我樂正觀利益眾生。我觀如來如如相，不異相不動相不作相，無生相無滅相，不有相不無相，不在方不離方，非三世非不三世，非二相非不二相，非垢相非淨相。以如是等正觀如來利益眾生。

佛告文殊師利：若能如是見於如來，心無所取亦無不取，非積聚非不積聚。

爾時舍利弗語文殊師利言：若能如是，如汝所說，見如來者，甚為希有！為一切眾生故，見於如來，而心不取眾生之相。化一切眾生向於涅槃，而亦不取向涅槃相。為一切眾生發大莊嚴，而心不見莊嚴之相。

爾時文殊師利童真菩薩摩訶薩語舍利弗言：如是！如是！如汝所說，雖為一切眾生發大莊嚴心，恒不見有眾生相。為一切眾生發大莊嚴，而眾生趣亦不增不減。假使一佛住世，若一劫若過一劫，如此一佛世界，復有無量無邊恒河沙諸佛，如是一一佛，若一劫若過一劫，晝夜說法，心無暫息，各各度於無量恒河沙眾生，皆入

涅槃，而眾生界亦不增不減。乃至十方諸佛世界，亦復如是。一一諸佛說法教化，各度無量恒河沙眾生，皆入涅槃，於眾生界亦不增不減。何以故？眾生定相不可得故，是故眾生界不增不減。

舍利弗復語文殊師利言：若眾生界不增不減，何故菩薩為諸眾生求阿耨多羅三藐三菩提，常行說法？

文殊師利言：若諸眾生悉空相者，亦無菩薩求阿耨多羅三藐三菩提，亦無眾生而為說法。何以故？我說法中，無有一法當可得故。

爾時佛告文殊師利：若無眾生，云何說有眾生及眾生界？

文殊師利言：眾生界相，如諸佛界。

又問：眾生界者，是有量耶？

答曰：眾生界量，如佛界量。

佛又問：眾生界量，有處所不？

答曰：眾生界量，不可思議。

又問：眾生界相，為有住不？

答曰：眾生無住，猶如空住。

佛告文殊師利：如是修般若波羅蜜時，當云何住般若波羅蜜？

文殊師利言：以不住法為住般若波羅蜜。

佛復問文殊師利：云何不住法名住般若波羅蜜？

文殊師利言：以無住相，即住般若波羅蜜。

佛復告文殊師利：如是住般若波羅蜜時，是諸善根，云何增長？云何損減？

文殊師利言：若能如是住般若波羅蜜，於諸善根無增無減。於一切法亦無增無減。是般若波羅蜜性相亦無增無減。

世尊！如是修般若波羅蜜，則不捨凡夫法，亦不取賢聖法。何以故？般若波羅蜜不見有法可取可捨。如是修般若波羅蜜，亦不見涅槃可樂，生死可厭。何以故？不見生死，況復厭離！不見涅槃，何況樂著！

如是修般若波羅蜜，不見垢惱可捨，亦不見功德可取。於一切法心無增減。何以故？不見法界有增減故。世尊！若能如是，是名修般若波羅蜜。

世尊！不見諸法有生有滅，是修般若波羅蜜。

世尊！不見諸法有增有減，是修般若波羅蜜。

世尊！心無憍取，不見法相有可求者，是修般若波羅蜜。

世尊！不見好醜，不生高下，不作取捨。何以故？法無好醜，離諸相故。法無高下，等法性故。法無取捨，住實際故。是修般若波羅蜜。

佛告文殊師利：是諸佛法，得不勝乎？

文殊師利言：我不見諸法有勝如相，如來自覺一切法空，是可證知。

佛告文殊師利：如是！如是！如來正覺，自證空法。

文殊師利白佛言：世尊！是空法中，當有勝如而可得耶！

佛言：善哉！善哉！文殊師利！如汝所說，是真法乎！

佛復謂文殊師利言：阿耨多羅是名佛法不？

文殊師利言：如佛所說，阿耨多羅是名佛法。何以故？無法可得名阿耨多羅。

文殊師利言：如是修般若波羅蜜，不名法器，非化凡夫法，亦非佛法，非增長法，是修般若波羅蜜。

復次，世尊！修般若波羅蜜時，不見有法可分別思惟。

佛告文殊師利：汝於佛法不思惟耶？

文殊師利言：不也，世尊！如我思惟，不見佛法，亦不可分別是凡夫法，是聲聞法，是辟支佛法，如是名為無上佛法。

復次，修般若波羅蜜時，不見凡夫相，不見佛法相，不見諸法有決定相，是為修般若波羅蜜。

復次，修般若波羅蜜時，不見欲界，不見色界，不見無色界，不見寂滅界。何以故？不見有法是盡滅相，是修般若波羅蜜。

復次，修般若波羅蜜時，不見作恩者，不見報恩者，思惟二相，心無分別，是修般若波羅蜜。

復次，修般若波羅蜜時，不見是佛法可取，不見是凡夫法可捨，是修般若波羅蜜。

復次，修般若波羅蜜時，不見凡夫法可滅，亦不見佛法而心證知，是修般若波羅蜜。

佛告文殊師利：善哉！善哉！汝能如是善說甚深般若波羅蜜相，是諸菩薩摩訶薩所學法印，乃至聲聞緣覺，學無學人，亦當不離是印而修道果。

佛告文殊師利：若人得聞是法，不驚不畏者，不從千佛所種諸善根，乃至百千萬億佛所久植德本，乃能於是甚深般若波羅蜜，不驚不怖！

文殊師利白佛言：世尊！我今更說般若波羅蜜義。
佛言：便說。

世尊！修般若波羅蜜時，不見法是應住是不應住，亦不見境界可取捨相。何以故？如諸如來不見一切法境

界相故，乃至不見諸佛境界，況取聲聞、緣覺、凡夫境界！不取思議相，亦不取不思議相。不見諸法有若干相，自證空法不可思議。如是菩薩摩訶薩，皆已供養無量百千萬億諸佛，種諸善根，乃能於是甚深般若波羅蜜，不驚不怖！

復次，修般若波羅蜜時，不見縛，不見解，而於凡夫乃至三乘，不見差別相，是修般若波羅蜜。

佛告文殊師利：汝已供養幾所諸佛？

文殊師利言：我及諸佛如幻化相，不見供養及與受者。

佛告文殊師利：汝今可不住佛乘耶？

文殊師利言：如我思惟，不見一法，云何當得住於

佛乘？

佛言：文殊師利！汝不得佛乘乎？

文殊師利言：如佛乘者，但有名字，非可得，亦不可見，我云何得？

佛言：文殊師利！汝得無礙智乎？

文殊師利言：我即無礙，云何以無礙而得無礙？

佛言：汝坐道場乎？

文殊師利言：一切如來不坐道場，我今云何獨坐道場？何以故？現見諸法住實際故。

佛言：云何名實際？

文殊師利言：身見等是實際。

佛言：云何身見是實際？

文殊師利言：身見如相，非實非不實，不來不去，亦身非身，是名實際。

舍利弗白佛言：世尊！若於斯義諦了決定，是名菩薩摩訶薩。何以故？得聞如是甚深般若波羅蜜相，心不驚！不怖！不沒！不悔！

彌勒菩薩白佛言：世尊！得聞如是般若波羅蜜具足法相，是即近於佛坐。何以故？如來現覺此法相故。

文殊師利白佛言：世尊！得聞甚深般若波羅蜜，能不驚！不怖！不沒！不悔！當知此人，即是見佛。

爾時復有無相優婆夷白佛言：世尊！凡夫法、聲聞法、辟支佛法、菩薩法、佛法，是諸法皆無相。是故於所從聞般若波羅蜜，皆不驚！不怖！不沒！不悔！何以

故？一切諸法，本無相故。

佛告舍利弗：善男子、善女人，若聞如是甚深般若波羅蜜，心得決定，不驚！不怖！不沒！不悔！當知是人即住不退轉地。若人聞是甚深般若波羅蜜，不驚不怖！信樂聽受，歡喜不厭！是即具足檀波羅蜜，尸波羅蜜，羼提波羅蜜，毘梨耶波羅蜜，禪波羅蜜，般若波羅蜜，亦能為他顯示分別，如說修行。

佛告文殊師利：汝觀何義為得阿耨多羅三藐三菩提，住阿耨多羅三藐三菩提？

文殊師利言：我無得阿耨多羅三藐三菩提，我不住佛乘，云何當得阿耨多羅三藐三菩提？如我所說，即菩提相。

佛讚文殊師利言：善哉！善哉！善哉！汝能於是甚深法中，巧說斯義。汝於先佛久種善根，以無相法，淨修梵行。

文殊師利言：若見有相，則言無相，我今不見有相，亦不見無相，云何而言以無相法淨修梵行？

佛告文殊師利：汝見聲聞戒耶？答曰：見。

佛言：汝云何見？

文殊師利言：我不作凡夫見，不作聖人見。不作學見，不作無學見。不作大見，不作小見。不作調伏見，不作不調伏見。非見非不見。

舍利弗語文殊師利言：汝今如是觀聲聞乘，若觀佛乘當復云何？

文殊師利言：不見菩提法，不見修行菩提及證菩提者。

舍利弗語文殊師利言：云何名佛？云何觀佛？

文殊師利言：云何為我？

舍利弗言：我者，但有名字，名字相空。

文殊師利言：如是！如是！如我但有名字，佛亦但有名字，名字相空，即是菩提。不以名字而求菩提。菩提之相，無言無說。何以故？言說、菩提二俱空故。

復次，舍利弗！汝問：云何名佛？云何觀佛者？不生不滅，不來不去，非名非相，是名為佛。如自觀身實相，觀佛亦然，唯有智者，乃能知耳，是名觀佛。

爾時舍利弗白佛言：世尊！如文殊師利所說般若波

羅蜜，非初學菩薩所能了知。

文殊師利言：非但初學菩薩所不能知，及諸二乘，所作已辦者，亦未能了知。如是說法，無能知者。何以故？菩提之相，實無有法而可知故。無見無聞，無得無念，無生無滅，無說無聽，如是菩提，性相空寂，無證無知，無形無相，云何當有得菩提者？

舍利弗語文殊師利言：佛於法界，不證阿耨多羅三藐三菩提耶？

文殊師利言：不也，舍利弗！何以故？世尊即是法界，若以法界證法界者，即是諍論。舍利弗！法界之相，即是菩提。何以故？是法界中無眾生相，一切法空故。一切法空即是菩提，無二無分別故。

舍利弗！無分別中，則無知者。若無知者，即無言說。無言說相，即非有非無，非知非不知，一切諸法亦復如是。何以故？一切諸法不見處所決定性故。如逆罪相，不可思議。何以故？諸法實相不可壞故。如是逆罪，亦無本性，不生天上，不墮地獄，亦不入涅槃。何以故？一切業緣，皆住實際，不來不去，非因非果。何以故？法界無邊，無前無後故。是故舍利弗，若見犯重比丘不墮地獄，清淨行者不入涅槃，如是比丘非應供非不應供，非盡漏非不盡漏。何以故？於諸法中住平等故。

舍利弗言：云何名不退法忍？

文殊師利言：不見少法有生滅相，名不退法忍。

舍利弗言：云何復名不調比丘？

文殊師利言：漏盡阿羅漢是名不調。何以故？諸結已盡，更無所調，故名不調。若過心行名為凡夫。何以故？凡夫眾生不順法界，是故名過。

舍利弗言：善哉！善哉！汝今為我善解漏盡阿羅漢義。

文殊師利言：如是！如是！我即漏盡真阿羅漢。何以故？斷求聲聞欲，及辟支佛欲。以是因緣，故名漏盡得阿羅漢。

佛告文殊師利：諸菩薩等坐道場時，覺悟阿耨多羅三藐三菩提不？

文殊師利言：菩薩坐於道場，無有覺悟阿耨多羅三藐三菩提。何以故？如菩提相，無有少法而可得者，名阿耨多羅三藐三菩提。無相菩提，誰能坐者？亦無起

者，以是因緣，不見菩薩坐於道場，亦不覺證阿耨多羅三藐三菩提。

文殊師利白佛言：世尊！菩提即五逆，五逆即菩提。何以故？菩提、五逆無二相故。無學無學者，無見無見者，無知無知者，無分別無分別者，如是之相，名為菩提。見五逆相，亦復如是。若言見有菩提而取證者，當知此輩即是增上慢人。

爾時世尊告文殊師利：汝言我是如來，謂我為如來乎？

文殊師利言：不也，世尊！我謂不是如來為如來耶。無有如相可名為如，亦無如來智能知於如。何以故？如來及智無二相故。空為如來，但有名字，我當云何謂是如來？

佛告文殊師利：汝疑如來耶？

文殊師利言：不也，世尊！我觀如來無決定性，無生無滅，故無所疑。

佛告文殊師利：汝今不謂如來出現於世耶？

文殊師利言：若有如來出現世者，一切法界亦應出現。

佛告文殊師利：汝謂恒沙諸佛入涅槃耶？

文殊師利言：諸佛一相，不可思議。

佛語文殊師利：如是！如是！佛是一相，不思議相。

文殊師利白佛言：世尊！佛今住世耶？

佛語文殊師利：如是！如是！

文殊師利言：若佛住世，恒沙諸佛亦應住世。何以

故？一切諸佛，皆同一相，不思議相，不思議相無生無滅。若未來諸佛出興於世，一切諸佛，亦皆出世。何以故？不思議中，無過去、未來、現在相。但眾生取著，謂有出世，謂佛滅度。

佛語文殊師利：此是如來、阿羅漢、阿鞞跋致菩薩所解。何以故？是三種人，聞甚深法，能不誹謗，亦不讚歎！

文殊師利白佛言：世尊！如是不思議法，誰當誹謗？誰當讚歎？

佛告文殊師利：如來不思議，凡夫亦不思議。

文殊師利白佛言：世尊！凡夫亦不思議耶？

佛言：亦不思議。何以故？一切心相皆不思議。

文殊師利言：若如是說，如來不思議，凡夫亦不思

議，今無數諸佛，求於涅槃，徒自疲勞。何以故？不思議法即是涅槃，等無異故。

文殊師利言：如是凡夫不思議，諸佛不思議。若善男子、善女人，久習善根，近善知識，乃能了知。

佛告文殊師利：汝欲使如來於眾生中為最勝耶？

文殊師利言：我欲使如來於諸眾生為最第一，但眾生相亦不可得。

佛言：汝欲使如來得不思議法耶？

文殊師利言：欲使如來得不思議法，而於諸法無成就者。

佛告文殊師利：汝欲使如來說法教化耶？

文殊師利白佛言：我欲使如來說法教化，而是說及聽者，皆不可得。何以故？住法界故，法界眾生，無差

別相。

佛告文殊師利：汝欲使如來為無上福田耶？

文殊師利言：如來是無盡福田，是無盡相，無盡相即無上福田，非福田非不福田，是名福田。無有明闇生滅等相，是名福田。若能如是解福田相，深植善種，亦無增減。

佛告文殊師利：云何植種不增不減？

文殊師利言：福田之相，不可思議，若人於中如法修善，亦不可思議。如是植種，名無增無減，亦是無上最勝福田。

爾時大地以佛神力，六種震動，現無常相，一萬六千人，皆得無生法忍。七百亿丘，三千優婆塞，四萬優婆夷，六十億那由他六欲諸天，遠塵離垢，於諸法中得

法眼淨。

文殊師利所說摩訶般若波羅蜜經卷上終

文殊師利所說摩訶般若波羅蜜經卷下

梁扶南國三藏曼陀羅仙譯

爾時阿難從座而起，偏袒右肩，右膝著地，白佛言：
世尊！何因緣故，如是大地六種震動？

佛告阿難：我說福田無差別相，故現斯瑞！往昔諸佛，亦於此處，作如是說福田之相，利益眾生，一切世界六種震動。

舍利弗白佛言：世尊！文殊師利是不可思議。何以故？所說法相不可思議。

佛告文殊師利：如是！如是！如舍利弗言，汝之所說實不可思議。

文殊師利白佛言：世尊！不可思議不可說，思議亦不可說，如是思議不思議性，俱不可說，一切聲相非思議，亦非不可思議。

佛言：汝入不思議三昧耶？

文殊師利言：不也，世尊！我即不思議，不見有心能思議者，云何而言入不思議三昧？我初發心，欲入是定，而今思惟，實無心相而入三昧。如人學射，久習則巧！後雖無心，以久習故，箭發皆中！我亦如是，初學不思議三昧，繫心一緣，若久習成就，更無心想，恒與定俱。

舍利弗語文殊師利言：更有勝妙寂滅定不？

文殊師利言：若有不思議定者，汝可問言，更有寂

滅定不？如我意解，不可思議定尚不可得，云何問有寂滅定乎？

舍利弗言：不可思議定，不可得耶？

文殊師利言：思議定者，是可得相，不可思議定者，不可得相，一切眾生實成就不思議定。何以故？一切心相，即非心故，是名不思議定。是故一切眾生相，及不思議三昧相，等無分別。

佛讚文殊師利言：善哉！善哉！汝於諸佛久殖善根，淨修梵行，乃能演說甚深三昧，汝今安住如是般若波羅蜜中。

文殊師利言：若我住般若波羅蜜中，能作是說，即是有想，便住我想。若住有想、我想中者，般若波羅蜜

便有處所。般若波羅蜜若住於無，亦是我想，亦名處所，離此二處，住無所住，如諸佛住，安處寂滅，非思議境界，如是不思議，名般若波羅蜜住處。般若波羅蜜處，一切法無相，一切法無作。般若波羅蜜即不思議，不思議即法界，法界即無相，無相即不思議，不思議即般若波羅蜜。般若波羅蜜法界，無二無別，無二無別即法界，法界即無相，無相即般若波羅蜜界，般若波羅蜜界即不思議界，不思議界即無生無滅界，無生無滅界即不思議界。文殊師利言：如來界及我界，即不二相。如是修般若波羅蜜者，則不求菩提。何以故？菩提相離，即是般若波羅蜜故。

世尊！若知我相而不可著，無知無著，是佛所知。

不可思議，無知無著，即佛所知。何以故？知體本性無所有相。云何能轉法界？若知本性無體無著者，即名無物，若無有物，是無處所，無依無住。無依無住即無生無滅，無生無滅即是有為無為功德。若如是知，則無心想，無心想者，云何當知？有為無為功德無知即不思議，不思議者，是佛所知，亦無取無不取，不見三世去來等相，不取生滅及諸起作，亦不斷不常，如是知者，是名正智，不思議智如虛空，無此無彼，不可比類，無好惡，無等等，無相無貌。

佛告文殊師利：若如是知，名不退智。

文殊師利言：無作智名不退智。猶如金鋌，先加鎚打，方知好惡，若不治打，無能知者，不退智相，亦復

如是，要行境界，不念不著，無起無作，具足不動，不生不滅，爾乃顯現。

爾時佛告文殊師利言：如諸如來，自說己智，誰當能信？

文殊師利言：如是智者，非涅槃法，非生死法，是寂滅行，是無動行，不斷貪欲、瞋恚、愚癡，亦非不斷。何以故？無盡無滅，不離生死，亦非不離，不修道，非不修道，作是解者，名為正信。

佛告文殊師利言：善哉！善哉！如汝所說，深解斯義。

爾時摩訶迦葉白佛言：世尊！於當來世，若說如是甚深正法，誰能信解，如聞受行？

佛告迦葉：今此會中，比丘、比丘尼、優婆塞、優婆夷，得聞此經者，如是人等，於未來世，若聞是法，必能信解，於甚深般若波羅蜜，乃能讀誦，信解受持，亦為他人分別演說。譬如長者，失摩尼寶，憂愁苦惱，後若還得，心甚歡喜！如是迦葉！比丘、比丘尼、優婆塞、優婆夷等，亦復如是，有信樂心，若不聞法，則生苦惱，若得聞時，信解受持，常樂讀誦，甚大歡喜！當知此人，即是見佛，亦即親近供養諸佛。

佛告迦葉：譬如忉利天上，波利質多羅樹，朶初出時，是中諸天，見是樹已，皆大歡喜！此樹不久，必當開敷！若比丘、比丘尼、優婆塞、優婆夷，得聞般若波羅蜜，能生信解，亦復如是，此人不久，亦當開敷，一

切佛法。於當來世，有比丘、比丘尼、優婆塞、優婆夷，聞般若波羅蜜，信受讀誦，心不悔沒，當知是人，已從此會，聽受是經，亦能為人聚落城邑，廣說流布，當知是人，佛所護念！如是甚深般若波羅蜜中，有能信樂無疑惑者，是善男子、善女人，於過去諸佛，久已修學，殖眾善根！譬如有人，以手穿珠，忽遇無上真摩尼寶，心大歡喜！當知是人，必已曾見。

如是迦葉！若善男子、善女人，修學餘法，忽然得聞甚深般若波羅蜜，能生歡喜，亦復如是，當知此人已曾聞故。

若有眾生，得聞甚深般若波羅蜜，心能信受，生大歡喜！如是人等，亦曾親近無數諸佛，從聞般若波羅

蜜，已修學故。譬如有人，先所經見城邑、聚落，後若聞人讚歎彼城，所有園苑，種種池泉，華果林樹，男女人民，皆可愛樂！是人聞已，即大歡喜！更勸令說，是城園苑，眾好嚴飾，雜華池泉，多諸甘果，種種珍妙，一切愛樂，是人得聞，重甚歡喜！如是之人，皆曾見故。若善男子、善女人，有聞般若波羅蜜，信心聽受，能生歡喜，樂聞不厭，而更勸說。當知此輩已從文殊師利，曾聞如是般若波羅蜜故。

迦葉白佛言：世尊！若將來世，善男子、善女人，得聞是甚深般若波羅蜜，信樂聽受，以是相故，當知此人亦於過去佛所，曾聞修學。

文殊師利白佛言：世尊！佛說諸法，無作無相，第

一寂滅！若善男子、善女人，有能如是諦了斯義，如聞如說，為諸如來之所讚歎！不違法相，是即佛說。亦是熾然般若波羅蜜相，亦名熾燃具足佛法，通達實相，不可思議。

佛告文殊師利：我本行菩薩道時，修諸善根，欲住阿鞞跋致地，當學般若波羅蜜。欲成阿耨多羅三藐三菩提，當學般若波羅蜜。若善男子、善女人，欲解一切法相，欲知一切眾生心界，皆悉同等，當學般若波羅蜜。文殊師利，欲學一切佛法，具足無礙，當學般若波羅蜜。欲學一切佛，成阿耨多羅三藐三菩提時，相好威儀，無量法式，當學般若波羅蜜。欲知一切佛，不成阿耨多羅三藐三菩提，一切法式及諸威儀，當學般若波羅

蜜。何以故？是空法中，不見諸佛菩提等故。若善男子、善女人，欲知如是等相無疑惑者，當學般若波羅蜜。何以故？般若波羅蜜，不見諸法若生若滅，若垢若淨。是故善男子、善女人，應作如是學般若波羅蜜。

欲知一切法無過去、未來、現在等相，當學般若波羅蜜。何以故？法界性相，無三世故。欲知一切法，同入法界，心無罣礙，當學般若波羅蜜。

欲得三轉十二行法輪，亦自證知，而不取著，當學般若波羅蜜。欲得慈心，遍覆一切眾生，而無限齊，亦不作念有眾生相，當學般若波羅蜜。欲得於一切眾生不起諍論，亦復不取無諍論相，當學般若波羅蜜。欲知是處非處，十力、無畏，住佛智慧，得無礙辯，當學般若

波羅蜜。

爾時文殊師利白佛言：世尊！我觀正法，無為無相，無得無利，無生無滅，無來無去，無知者，無見者，無作者。不見般若波羅蜜，亦不見般若波羅蜜境界。非證非不證，不作戲論，無有分別。一切法無盡、離盡。無凡夫法，無聲聞法，無辟支佛法、佛法。非得非不得，不捨生死，不證涅槃，非思議非不思議，非作非不作，法相如是。不知云何當學般若波羅蜜？

爾時佛告文殊師利：若能如是知諸法相，是名當學般若波羅蜜。菩薩摩訶薩，若欲學菩提自在三昧，得是三昧已，照明一切甚深佛法，及知一切諸佛名字，亦悉了達諸佛世界，無有障礙，當如文殊師利所說般若波羅

蜜中學。

文殊師利白佛言：世尊！何以故名般若波羅蜜？

佛言：般若波羅蜜，無邊無際，無名無相，非思量，無歸依，無洲渚，無犯無福，無晦無明，猶如法界，無有分齊，亦無限數，是名般若波羅蜜，亦名菩薩摩訶薩行處，非行非不行處，悉入一乘，名非行處。何以故？無念無作故。

文殊師利白佛言：世尊！當云何行，能速得阿耨多羅三藐三菩提？

佛言文殊師利：如般若波羅蜜所說行，能速得阿耨多羅三藐三菩提。復有一行三昧，若善男子、善女人，修是三昧者，亦速得阿耨多羅三藐三菩提。

文殊師利言：世尊！云何名一行三昧？

佛言：法界一相，繫緣法界，是名一行三昧。若善男子、善女人，欲入一行三昧，當先聞般若波羅蜜，如說修學，然後能入一行三昧。如法界緣，不退不壞，不思議，無礙無相。

善男子、善女人，欲入一行三昧，應處空閑，捨諸亂意，不取相貌，繫心一佛，專稱名字，隨佛方所，端身正向，能於一佛，念念相續，即是念中能見過去、未來、現在諸佛。何以故？念一佛功德，無量無邊！亦與無量諸佛功德無二。不思議佛法等無分別，皆乘一如，成最正覺。悉具無量功德，無量辯才，如是入一行三昧者，盡知恒沙諸佛法界無差別相。阿難所聞佛法，得念

總持，辯才智慧，於聲聞中，雖為最勝，猶住量數，則有限礙。若得一行三昧，諸經法門，一一分別，皆悉了知，決定無礙，晝夜常說，智慧辯才，終不斷絕。若比阿難多聞辯才，百千等分不及其一。

菩薩摩訶薩應作是念，我當云何逮得一行三昧，不可思議功德，無量名稱？

佛言：菩薩摩訶薩，當念一行三昧，常勤精進，而不懈怠，如是次第，漸漸修學，則能得入一行三昧，不可思議功德作證。除謗正法，不信、惡業、重罪障者，所不能入。

復次，文殊師利！譬如有人，得摩尼珠，示其珠師。珠師答言：此是無價真摩尼寶。即求師言：為我治磨，

勿失光色。珠師治已，隨其磨時，珠色光明，映徹表裏。文殊師利！若有善男子、善女人，修學一行三昧，不可思議功德，無量名稱，隨修學時，知諸法相，明達無礙，功德增長，亦復如是。

文殊師利！譬如日輪，光明遍滿，無有減相，若得一行三昧，悉能具足一切功德，無有缺少，亦復如是。照明佛法，如日輪光！

文殊師利！我所說法，皆是一味、離味、解脫味、寂滅味。若善男子、善女人，得是一行三昧者，其所演說，亦是一味、離味、解脫味、寂滅味，隨順正法，無錯謬相。

文殊師利！若菩薩摩訶薩，得是一行三昧，皆悉滿

足助道之法，速得阿耨多羅三藐三菩提。

復次，文殊師利！菩薩摩訶薩，不見法界有分別相，及以一相，速得阿耨多羅三藐三菩提相不可思議。是菩提中，亦無得佛。如是知者，速得阿耨多羅三藐三菩提。

若信一切法，悉是佛法，不生驚怖，亦不疑惑，如是忍者，速得阿耨多羅三藐三菩提。

文殊師利白佛言：世尊！以如是因，速得阿耨多羅三藐三菩提耶？

佛言：得阿耨多羅三藐三菩提，不以因得，不以非因得。何以故？不思議界，不以因得，不以非因得。若善男子、善女人，聞如是說，不生懈怠，當知是人，已

於先佛種諸善根，是故比丘、比丘尼，聞說是甚深般若波羅蜜，不生驚怖！即是從佛出家。若優婆塞、優婆夷，得聞如是甚深般若波羅蜜，心不驚怖！即是成就真歸依處。

文殊師利！若善男子、善女人，不習甚深般若波羅蜜，即是不修佛乘。譬如大地，一切藥木，皆依地生長。文殊師利！菩薩摩訶薩，亦復如是，一切善根，皆依般若波羅蜜而得增長，於阿耨多羅三藐三菩提不相違背。

爾時文殊師利白佛言：世尊！此閻浮提，城邑、聚落，當於何處演說如是甚深般若波羅蜜？

佛告文殊師利：今此會中，若有人聞般若波羅蜜，皆發誓言：於未來世，常得與般若波羅蜜相應，從是信

解，未來世中，能聽是經。當知此人，不從餘小善根中來所能堪受！聞已歡喜！

文殊師利！若復有人，從汝聽是般若波羅蜜，應作是言：此般若波羅蜜中，無聲聞法、辟支佛法、菩薩法、佛法，亦無凡夫生滅等法。

文殊師利白佛言：世尊！若比丘、比丘尼、優婆塞、優婆夷，來問我言：云何如來說般若波羅蜜？我當答言：一切諸法，無諍論相，云何如來當說般若波羅蜜？何以故？不見有法可與法諍論，亦無眾生心識能知。

復次，世尊！我當更說究竟實際。何以故？一切法相，同入實際，阿羅漢無別勝法。何以故？阿羅漢法、凡夫法，不一不異故。

復次，世尊！如是說法，無有眾生已得涅槃，今得、當得。何以故？無有決定眾生相故。文殊師利言：若人欲聞般若波羅蜜，我當作如是說，其有聽者，不念不著，無聞無得，當如幻人，無所分別，如是說者，是真說法。是故聽者，莫作二相，不捨諸見，而修佛法，不取佛法，不捨凡夫法。何以故？佛及凡夫，二法相空，無取捨故。若人問我，當作是說，如是安慰，如是建立。善男子、善女人，應如是問，作如是住，心不退不沒，當如法相，隨順般若波羅蜜說。

爾時世尊歎文殊師利：善哉！善哉！如汝所說，若善男子、善女人，欲見諸佛，應學如是般若波羅蜜。欲親近諸佛，如法供養，應學如是般若波羅蜜。若欲言如

來是我世尊，應學如是般若波羅蜜。若欲言如來非我世尊，亦應學如是般若波羅蜜。若欲成阿耨多羅三藐三菩提，應學如是般若波羅蜜。若欲不成阿耨多羅三藐三菩提，亦應學如是般若波羅蜜。若欲成就一切三昧，應學如是般若波羅蜜。若欲不成就一切三昧，亦應學如是般若波羅蜜。何以故？無作三昧，無異相故，一切法無生無出故。

若欲知一切法假名，應學如是般若波羅蜜。若欲知一切眾生修菩提道，不求菩提相，心不退沒，應學如是般若波羅蜜。何以故？一切法皆菩提相故。

若欲知一切眾生行非行相，非行即菩提，菩提即法界，法界即實際，心不退沒，應學如是般若波羅蜜。

若欲知一切如來神通變化無相無礙，亦無方所，應學如是般若波羅蜜。

佛告文殊師利：若比丘、比丘尼、優婆塞、優婆夷，欲得不墮惡趣，當學般若波羅蜜一四句偈，受持讀誦，為他解說，隨順實相。如是善男子、善女人，當知決定得阿耨多羅三藐三菩提，則住佛國。若聞如是般若波羅蜜，不驚不畏！心生信解，當知此輩佛所印可，是佛所行大乘法印。若善男子、善女人，學此法印，超過惡趣，不入聲聞辟支佛道，以超過故。

爾時帝釋三十三天，以天妙華、優鉢羅華、拘物頭華、芬陀利華、天曼陀羅華等，天栴檀香及餘末香，種種金寶，作天伎樂，為供養般若波羅蜜，并諸如來及文

殊師利，以散其上，作是供養已，願我常聞般若波羅蜜法印。

釋提桓因復作是願：願閻浮提善男子、善女人，常使得聞是經，決定佛法，皆令信解，受持讀誦，為人演說，一切諸天，為作擁護。

爾時佛告釋提桓因言：憍尸迦！如是！如是！善男子、善女人，當得決定諸佛菩提。

文殊師利白佛言：世尊！如是受持，善男子、善女人，得大利益，功德無量！

爾時以佛神力，一切大地，六種震動！佛時微笑，放大光明！遍照三千大千世界。

文殊師利白佛言：世尊！即是如來印般若波羅蜜

相。

佛言：文殊師利！如是！如是！說般若波羅蜜已，皆現此瑞，為印般若波羅蜜故，使人受持，令無讚毀！何以故？無相法印，不可讚毀！我今以是法印，令諸天魔，不能得便。

佛說是已，爾時諸大菩薩及四部眾，聞說般若波羅蜜，皆大歡喜，信受奉行。

文殊師利所說摩訶般若波羅蜜經卷下終

聖妙吉祥真實名經

依據大正藏第廿冊
經數 1190 校對

梵語阿耶曼祖悉哩捺麻捺機碇 此云誦聖妙吉祥真實名經

元講經律論習密教

土番譯主聶崖沙門釋智譯

敬禮孺童相妙吉祥

復次吉祥持金剛 難調伏中勝調伏

勇猛超出三界內 自在金剛密中勝

眼如白蓮妙端正 面貌圓滿若蓮華

自手執持勝金剛 時時仰上作拋擲

復次第現忿等像 亦有無邊持金剛

勇猛調伏難調者 具威猛相極怖畏

於金剛尖出勝光
有大慈悲及智慧
具足喜樂安隱心
於行正覺行中尊
向彼如來末過鑿
於前恭敬伸合掌
遍主與我作饒益
如幻網中成究竟
有諸煩惱亂其心
為利一切有情類
究竟正覺出有壞

自手向上令拋擲
方便益生極殊勝
示有忿怒之形相
眾皆來集身恭謹
究竟正覺禮敬已
端坐正念而告白
益我慈悲於我故
願我真實獲菩提
不解泥中而沒溺
令獲無上之果故
是有情師及導師

註：末過鑿
即薄伽梵

亦大記句達真性
彼出有壞之智身
亦是智身自超出
誦彼殊勝真實名
無比大義勝柔軟
過去正覺等已說
現在究竟等正覺
大幻化網本續中
如彼無邊諸佛敕
世尊究竟正覺等
如我決定未出間
遠離煩惱令無餘

了知根心殊勝者
是大頂旋言詞主
妙吉祥智勇識者
是甚深義廣大義
初善中善及後善
於未來中當演說
亦遍數數皆宣說
持大金剛持密咒
妙音宣暢今當說
願成真實持咒故
當勤堅固而受持
於諸謬解捨離故

即以無別無異心
密自在者持金剛
告白畢已而合掌
復次釋迦出有壞
於自面門殊勝舌
顯現三種世界內
有情皆具三惡趣
於其清淨梵音中
為持金剛大力者
具足有大慈悲者
具足智身妙吉祥

為諸有情願宣說
向如來前說是言
以身恭敬坐其前
究竟正覺兩足尊
廣長橫遍令舒演
調伏四魔諸怨敵
為現清淨微笑相
遍滿三種世界已
密自在主而答說
汝為利益有情故
誦真實名是大益

能作清淨除罪業	於我精勤應諦聽
善哉吉祥持金剛	手持金剛汝善哉
密主我為此事故	為汝巧妙令宣說
汝今一心應諦聽	唯然末遇鑿善哉
復次釋迦出有壞	一切密咒大種性
密咒明咒持種性	於其三種令觀察
世間及出世間性	顯作世間大種性
殊勝廣大手印種	大種大髻應觀察
言詞之主演偈頌	密咒王者具六種
將令顯出於無二	無生法者自宣說

啞阿（長呼）依倚（引）烏鄔（引）唵嘍（引）阿嚩（引）嗽啞悉低（二合）

哆訖哩(二合)低(三)默捺沒隆(二合)低(三)囉(上聲)嶸沒哆(四)母怛
默(五)怛囉(二合)咄不囉(二合)低默(六)唵(七)末唎囉(二合)帝疙折
(二合)捺豁(身切)渴情捺不囉(二合)默默捺姆吟(二合)怛英默捺葛
(二合)也幹(引)宜說囉啊囉鉢拶捺拽訂捺麻

(此下十四頌。出現三十七菩提中圍。故讚金剛菩提心即是八十六名數)

如是正覺出有壞 究竟正覺啞中出

啞者一切字中勝 是大利益微妙字

諸境之內出無生 即此遠離於言說

是諸說中殊勝因 令顯一切諸言說

大供養者是大欲 一切有情令歡喜

大供養者即大瞋 一切煩惱廣大怨

大供養者是大癡

亦愚癡心除愚癡

大供養者即大忿

即是忿恚之冤讎

大供養者大貪欲

一切貪欲皆除斷

大欲即是於大樂

大安樂者大喜足

大境色與廣大身

大色并及大形像

大明及與大廣大

大中圍者是廣大

持於廣大智慧器

鉤煩惱鉤大中勝

普聞妙聞皆廣大

顯中即是廣大顯

解者執持大幻化

大幻化中成利益

大幻化內喜中喜

大幻化中施幻術

大施主中最為尊

大持戒中持殊勝

於大忍辱即堅固

以大精進悉棄捨

以大禪定住靜慮
具足大力大方便
大慈自性無量邊
有大智慧具大智
具大神通及大力
復大神通大名稱
三有大山悉能壞
大緊即是大雄勇
尊者大種即殊勝
住在於彼大乘相

以大智慧令持身
大願勝智是大海
亦是大悲勝智慧
大解即是大方便
大力及與大速疾
大力令他令摧伏
持大堅固大金剛
於大怖中施怖畏
上師密咒大殊勝
大乘相中最殊勝

（此下二十四頌三句。是出現眾明主中圍故讚清淨法界一百八名數）

廣大正覺眾明主

具大寂默大寂默

大密咒中令出現

有大密咒自性理

欲得十種到彼岸

住於十種彼岸中

十彼岸到是清淨

即是十種彼岸理

尊者十地自在者

住在於彼十地中

具知十種之自性

持於十種清淨者

十種義相義中義

自在寂默十力主

作諸利益無有遺

具有十種大自在

離彼無垢戲論主

真如自性清淨王

言說真實不諱句

如其所說而依行

於無二中說無二

住於真實邊際中

無我師子具音聲
遊行一切有義中
勝及最勝勝怨中
集中之師集中勝
執持愛護大靈驗
句王句主能言詞
以真實句說真實
不還之中復不還
種種決定超出中
苾芻羅漢即漏盡
獲得安樂無怖畏

外道惡獸極怖畏
速疾猶若如來心
於轉輪者施大力
集王集主集自在
大義不受他思念
句中自在句無邊
於彼四諦宣說者
教如緣覺及獨覺
彼諸大中獨一因
調伏諸根并離欲
成滿清涼亦無濁

明解及與於神足
於我不執不執我
能到輪迴之彼岸
於一智中而出現
法王妙法具顯現
以法自在法中王
有義成就滿誓願
無盡法界實離妄
具大福田勝福足
具足智者解有無
諸常見中勝禪定
自解各各皆不動

世間善逝勝明解
住於二種諦理中
所作已畢住露地
以智慧器破一切
於世間中勝明照
能演妙道令宣說
捨離一切諸虛妄
勝妙法界極無盡
智中廣大殊勝智
無二種中而積集
誓修靜慮是智王
最上勝者持三身

具足正覺五身性
遍主五種智自性
首冠莊嚴五覺性
持五種眼離執著
令諸正覺皆增長
正覺尊子勝微妙
勝智出有出生處
出現法中離三有
獨一堅固金剛性
初生已作有情主
現空性中自超出
勝智妙智如大火
以大光明遍照耀
以智慧明令顯現
是有情燈智慧炬
具大威勢顯光明
是勝咒主明咒王
密咒王者作大益
具大肉髻希有頂
大虛空主說種種
是諸正覺勝自性
具足有情歡喜眼

能令增長種種相
諸大仙等皆供讚
令持三種之密咒
大記句者持密咒
尊者守護三寶故
宣說最勝三乘法
真勝有義之縑索
是大執持金剛索
金剛鐵鉤大縑索

(此下十頌句。是出現不動佛中圍。故讚大圓鏡智即七十一名數)

怖畏金剛施怖畏
金剛王者六面怖
六眼六臂力具足
亦是骨相咬牙者
曷辣曷辣具百面
是獄王主魔中王
有力金剛能作怖
名稱金剛金剛心
幻化金剛具大腹
金剛中生金剛主

是金剛心如虛空
不動獨髮相嚴身
所著大象生皮衣
大緊呵呵皆哮吼
希希聲吼能作怖
若作笑者有響笑
金剛喜笑大哮吼
金剛勇識大勇識
金剛王者大安樂
金剛堅者大歡喜
金剛吽者吽聲吼
器中執持金剛箭
金剛劍斷令無餘
眾持金剛具金剛
一種金剛能退敵
熾焰金剛施惡眼
金剛頭髮如焰熾
金剛降臨大降臨
具足百眼金剛眼
身中具有金剛毛
金剛毛者獨一身
指甲增長金剛尖

以金剛心皮堅硬
執金剛髮具吉祥
以金剛鬘而莊嚴
呵呵響笑決定吼
具六種字金剛聲
大柔和聲大音聲
三世界中獨一音
遍虛空界聲哮吼
諸有聲中皆殊勝

(此下四十二頌。出現無量壽佛中圍。故讚妙觀察智即二百七十五名數)

真實無我真實性
即是真際無有字
宣說空性眾中勝
甚深廣大聲哮吼
即是法螺具大聲
亦法犍椎大音聲
超越無住圓寂性
十方法中即大鼓
無色有色中微妙
具種種相意中生

具諸相者顯吉祥
無能過中大名稱
住於最極聖道中
三世界中一孺童
三十二相具莊嚴
是世間解為勝師
救世間尊意無私
盡空邊際悉受用
解散一切無明殼
能滅無餘諸煩惱
勝智灌頂具頭冠

執持影相使無餘
三界之中大自在
大興盛中之法幢
長老尊者四生主
三界所愛於中妙
是世勝師無怖畏
救中救者而無上
解一切中智慧海
亦能破壞三有網
到彼輪迴大海岸
真實究竟令莊嚴

滅除三種諸苦惱
決定解脫諸障難
超越一切煩惱垢
諸有情中即大尊
諸有身中即解勝
持於如意大寶珠
圓滿是大如意樹
能作有情諸利益
亦解善惡及時辰
解時及解有情根
具足功德解功德
吉祥之中最吉祥

滅三毒得三解脫
住於如空平等中
能解三時及無師
功德帶中之鬘帶
虛空道中真實住
遍主一切寶中勝
勝妙淨瓶大中勝
隨順有情而利益
遍主解記具記句
亦能作於三解脫
解法讚歎現吉祥
吉祥名稱善名稱

大止息中大法筵
恭敬承侍悉具足
具勝施勝是尊者
於世怨中勝中勝
頂髻及髻各分埵
五面具有五種髻
即是禿髮大勤息
大苦行者建苦行
梵婆羅門解淨梵
脫離纏縛解脫身
超越悲哀滅悲哀

大歡喜中大音樂
勝喜名稱性吉祥
微妙歸處堪歸救
離一切怖無有餘
頭髮摸拶戴頭冠
五髻各繫花髻帶
行淨梵行勝勤息
微妙淨宮喬答彌
超圓寂時得淨梵
解脫圓寂是圓寂
微妙決定近出離

能除苦樂之邊際
不可比量無與等
雖性不改亦普遍
無塵離塵即無垢
最極寢寤覺自性
識心超越於法性
離虛妄者默然成
正覺無垢亦無邊
獨一智眼無垢染
以句自在廣宣說
宣陳微妙殊勝處
於勝觀察殊勝喜

離欲身中而超越
非見非顯非朗然
微細無漏離種性
離失捨除放過愆
諸解諸明即微妙
持理即是無二智
修於三世正覺行
最初正覺亦無因
具足智身即如來
演勝丈夫法中王
詮說師子無與等
積聚威勢是入意

熾焰光中吉祥相
殊勝大醫即尊者
亦是諸藥枝茂樹
入意三界中殊勝
十方一切虛空界
遊行唯一廣大傘
吉祥蓮華舞自在
具於正覺大威勢
是諸正覺大修習
金剛大寶灌頂相
世間自在諸法性

手臂光耀令顯現
能離痛刺無有上
對治諸病大怨讎
吉祥遊宿具中圍
建立法幢極微妙
即具慈悲妙中圍
廣大邊主大寶傘
持於一切正覺身
是諸正覺唯正法
諸大寶性即自在
持金剛者一切王

一切正覺即大心

一切正覺在心中

一切正覺之大身

亦是一切正覺語

金剛日是具大明

金剛月是無垢光

離欲等中是大欲

種種諸色熾焰光

金剛跏趺正等覺

執持真實究竟法

吉祥正覺蓮華生

亦能攝持正覺藏

復持種種幻化王

廣大正覺持明咒

聰明金剛即大劍

真實清淨殊勝字

是廣大乘除苦惱

金剛法者廣大器

金剛甚深唧唧

金剛智慧依義解

諸到彼岸皆究竟

一切地中具莊嚴

真實清淨無我法

真實智月殊勝光

廣大精進幻化網
金剛坐者具無餘
一切殊勝妙智慧
一切正覺之大心
是一切體殊勝性
即無生法種種義
廣大智慧剎那中
現解一切諸法者
殊勝不動自性淨
一切正覺現於前

本續一切殊勝主
持於一切智慧身
即於心地持往復
復持種種之化輪
亦持一切體自性
持於一切法自性
解持諸法無遺餘
勝持寂默真實際
持於正覺妙菩提
智火熾焰光顯盛

(此下二十四頌。讚平等性智。故即是出現寶生佛中圍即一百四名數)

隨樂成就微妙義

一切惡趣悉清淨

諸有情中殊勝尊

一切有情令解脫

煩惱敵中獨勇猛

威猛能破愚癡怨

具吉祥智而嚴身

執持堅固之惡相

能令動於百種手

舉步相中而作舞

吉祥百手皆圓滿

遍空界中令作舞

大地中圍一界分

以一足跟堅踏之

以足爪甲界分內

淨梵世界盡令押

無二一義法之義

即微妙義無怖義

亦種種識具色義

於心意識具相續

體義無餘數歡喜

愛空之性殊勝智

捨離三有之貪欲
色貌鮮潔若白雲
亦如初出妙日輪
頭冠殊勝尖末青
大寶光明具吉祥
諸百世界皆令動
持於廣大實性念
以七覺支為花香
解八道支義理故
於諸有情大分著
一切有情意中生

二有歡喜廣大者
光明殊勝如秋月
爪如赤銀光皎潔
勝髮亦復紺青色
正覺化身莊嚴具
而能具彼神足力
四念住中靜慮王
即是如來功德海
是解真實正覺道
亦如虛空無所著
速疾猶如有情意

解諸有情根與義	能奪有情諸心意
亦解五蘊實性義	清淨五蘊令受持
決定出彼諸邊際	亦能出於決定中
向決定出道中住	宣說一切決定出
拔十二支三有根	持於清淨十二種
具有四諦之義相	解持八種之心識
十二實義令具足	十六實性現體解
以二十種成菩提	勝解一切正覺相
一切正覺幻化身	無邊億界令出現
彼諸剎那現了解	亦解剎那諸有義
種種乘者方便理	利益去來皆了解
決定出於三乘者	住在於彼一乘果

諸煩惱界清淨性
過於一切江海中
煩惱及與隨煩惱
以於大悲智方便
一切想義皆棄捨
能緣一切有情心
在彼一切有情心
充滿一切有情心
成就究竟無錯謬
於三義中無疑智
五蘊義理三時中

盡能滅除諸業果
寂靜如行中出現
及以習氣皆棄捨
於諸有情作利益
亦令滅除心識意
亦解一切有情意
隨順一切有情意
令諸有情心歡喜
一切謬解皆捨離
諸我三種功德性
於諸剎那能分別

一剎那中正等覺 持於一切正覺性
無身之身身中勝 解了諸身之邊際
種種諸相諸處顯 大寶即是大寶首

(此下十五頌。讚成所作智。故出現有義成就佛中圍。即九十五名數)

解了一切正覺者 正覺菩提即無上
出密咒處無文字 大密咒者是三種
諸密咒義令增長 大明點者無文字
大空即是五種字 空明點者六種字
種種諸空無種種 十六半半具明點
亦無支分超於數 即四靜慮之初首
了解一切靜慮支 明解靜慮種族性

具靜慮身身中勝
化身即是殊勝身
種種化現十方中
自在之天天中天
自在無滅天之師
三有寂靜令超越
名稱普於十方界
備足莊嚴慈鎧者
智慧如劍持弓箭
能降勇猛魔怨者
亦能退諸魔軍旅

受用身者一切勝
持彼化現之種性
依法利益於有情
非天自在非天主
作壞作壞即自在
唯一師者有情師
施法之主廣大者
以慈愍心為堅甲
欲離不解煩惱敵
兼除四種怖畏魔
究竟正覺救世間

是堪供讚禮敬處
應供詠處最殊勝
一步能遊三世界
清淨三明是清淨
菩提勇識大勇識
達彼智慧之實性
一切自明令他明
超離一切諸譬喻
尊者即是法施主
有情奉施殊勝主
微妙義中淨吉祥
具足吉祥皆成辦

亦是恆常承侍境
真堪禮敬勝上師
如空無邊實鎮押
具六神通隨六種
大神足者超世間
亦獲智慧之體性
殊勝丈夫於一切
能智所智殊勝主
宣說四種手印義
決定所入三種住
三世間中大勝福
曼祖悉哩勝吉祥

(此下五頌。如次結讚五智。大圓鏡清淨法界妙觀察平等性成所作智。如次一頌一智也)

勝施金剛我敬禮

真實邊際我敬禮

出現空性我敬禮

正覺菩提我敬禮

正覺貪著我敬禮

正覺欲者我敬禮

正覺歡喜我敬禮

正覺戲論我敬禮

正覺微笑我敬禮

正覺笑者我敬禮

正覺語者我敬禮

正覺心者我敬禮

出現無者我敬禮

出現正覺我敬禮

出現虛空我敬禮

出現智者我敬禮

幻化網者我敬禮

正覺顯論我敬禮

一切一切我敬禮

彼智身者我敬禮

持金剛金剛手。此妙吉祥智勇識不共真實名。是出有壞之智身一切如來之智身。汝今應當生大歡喜。滿淨意樂增長無上。即能清淨身語意三之密。若不能究竟不能清淨地者。令到彼岸福智二足皆悉圓滿令其清淨。義無有上。若未解者令解。未得者令得。自此至於一切如來微妙法理真實持故。我為宣說開示顯解令其攝受。持金剛金剛手。此者我於汝種性中。及一切密咒法性攝受中。而作攝受。持金剛金剛手。此真實名者。即是一切如來最極清淨。真實潔淨一切智智之性。身語意三之密。亦是一切正覺菩提。即能了解

真實究竟諸正覺故。亦是無上一切如來。體解一切善逝法界。於諸勝中而能破壞一切諸魔之力。一切十力中即十力之十力。一切智智性中即一切智智之性。是諸法中之敕。真實成就一切正覺。亦是一切大菩提勇識。福智二足真實究竟無垢最極清淨也。亦是一切聲聞緣覺出生之處。具足人天境界。是大乘之體性。出生諸菩薩行處。即一切聖道之邊際也。亦是察度諸解脫道決定出生處。亦是不斷如來種性。增長菩提勇識大勇識種族種性。亦能攝伏於他一切作狂敵者。破壞一切外道。退捨四魔軍將之力。亦是真實攝受一切眾生。決定成熟一切趣向聖果。諸淨梵四宮之靜慮。諸一心之禪定也。亦是調伏身語意三。精勤禪定能離一切合集。亦捨一切煩惱及隨煩惱。滅除一切障礙。解

脫一切繫縛。亦是解脫一切諸蘊。滅諸亂心成辦一切
出生處。捨離一切盛衰事。亦能關閉一切諸惡趣門。
開示解脫眾樂勝道。令其不入輪迴之中。而能轉大法
輪。建立一切如來傘蓋幢旗。一切妙法正法之宮。亦
是菩提勇識。於密咒門而修習者速得成就。亦是了解
菩薩摩訶薩精勤般若波羅蜜多之定。解了一切精勤無
二戲論之空性。一切到彼岸之二足。究竟真實清淨一
切究竟地。各各了解諸聖四諦。一心體解一切諸法四
種念住。此真實名者。乃至一切正覺功德。能作真實
究竟也。持金剛金剛手。此真實名者。能滅有情身語
意三之行無餘罪業。亦能清淨一切有情諸惡趣類。令
其退捨一切惡趣。真實斷除一切業障無有遺餘。能生
一切相續八難者令其不生。能滅八種怖畏。能破一切

惡夢。決定能盡一切惡相。能滅一切惡見及諸惡魔。亦能遠離一切怨魔之行。增長一切福善。亦能除滅諸惡覺觀令其不生。破滅一切憍慢威勇我執。不生一切苦惱憂愁。亦是一切如來之心。諸菩薩之密。一切聲聞緣覺之大密。一切密咒及其手印。真實增長諸不可說念及正念。增長無上善巧智。亦能具足無患諸力自在。亦能增長吉祥柔善微妙。名稱善說偈讚歎美。亦能真實除滅一切病患廣大怖畏。亦是極清淨中最極清淨。極能作清淨中最極能作清淨。極成辦中最極成辦。極吉祥中最極吉祥。諸欲歸依者為作歸依。欲宮殿者為作宮殿。欲擁護者為作擁護。欲親軍將者為作軍將。欲洲渚者為作洲渚。欲依仗者為作無上依仗。欲過三有大海者為作舟船。亦是除滅一切病苦之藥王。分別

取捨之決智。摧諸惡見大闇之明智。能滿一切有情誓願。如摩尼寶珠。亦能獲得妙吉祥智身一切智智之性。令得五眼見清淨智。亦是財施法施無畏施真實捨故。令六波羅蜜而得圓滿。亦是福慧二足及諸靜慮。令究竟故能得十地。亦能捨離二邊故。即無二法性非餘法性。無綺飾故即是真實自性。亦是如來清淨智自性故。即真實邊際之自性。亦能除滅百千惡見叢林故。即一切如來真空之自性。此真實名者。即是無二法性義之真實名。若有誦持演說者。是一切法不可說之自性也。持金剛金剛手。若有善男子善女人。依密咒門修習者。於此出有壞妙吉祥智勇識。一切如來智身無二真如之真實名。是頂髻之珠者。文字句義一切通徹。無有遺犯亦無增減。每日三時若持若誦若讀若說。思惟義理

依時為他解脫。時各各應想妙吉祥智勇識身。向諸門中令心止處。於愛樂實性門中誠實作想。了解一切殊勝法智慧無濁。信心具足相續繫念一心禪定者。彼諸三世及無始世。一切正覺菩提勇識等皆來集會。得解一切法并現其身。一切正覺菩提勇識。以身語意三業與自種性真實攝受。一切正覺菩提勇識。將諸利益而作饒益。能得一切法中無怖無畏辯說無礙。復有一切諸阿羅漢聲聞緣覺攝持。聖法心中亦皆現身。復有調伏一切諸惡大金剛王及持大金剛等。為護諸有情故。將變化身現種種形令其精神威勢無能攝伏。能成一切密咒手印記句中圍無餘。密咒明咒王。并頻那夜迦諸惡魔怨。并諸退壞一切他不能者及大母等。於其晝夜各剎那時。諸威儀中潛伏其身為作救護。復有淨梵帝

釋并釋近臣。大力摧伏如伏嬰童。及大自在種族貓子大黑。作戲自在獄主水神。孤屏囉鬼子母等。擁護十方世界者恒常相續。若晝若夜若行若住。若坐若臥若睡若覺。入定出定獨住在眾。潛伏其身為作救護。或住村邑聚落川原。國界王宮門限門樓。大路小路四達三岑。村中店舍空舍。山藪江川叢林大叢林。若不作淨昏醉放逸之處。恒常一切門中晝夜潛伏殊勝救護成勝妙樂。更復天龍施礙乾闥婆阿修羅迦樓羅緊那羅摩睺羅伽人與非人眾曜遊宿。及諸天母集主七母諸施礙母并食肉母。此合集一心一意。并諸軍將眷屬雜使。能為一切潛伏救護。增長精神具足色力。威勢殊勝無病延壽。持金剛金剛手。此真實名頂髻珠者。若起誓願日日三時。無遺念誦三遍書寫令讀。時想念出有壞

妙吉祥智勇識身。與此相同而作禪定者。以此利益故不經多時。即妙吉祥變化於像令其得見。亦見盡虛空界所處者。一切正覺菩提勇識。種種身相大有情者。於何時分依何所作。不墮地獄趣不生惡道中。不生惡種姓不生邊地下賤。亦得諸根具足不作邪見。亦不生邪見家。不生無佛國中。生值佛國時不捨正法亦不遠離。不生長壽天中不生饑饉疫疾刀兵等劫。不生五濁惡世不遭王怖惡怖賊怖。於世世中不逢下劣貧窮之怖。不值穢氣毀謗輕賤惡名惡語之怖畏。恒常得生本性高貴勝族中。能成一切端嚴勝相顏色美妙。於諸世人皆悉愛樂可意。若與相隨情和悅樂見者歡喜。於諸人中端正嚴好。具大福相發言無滯。隨所生處得宿命智。受用廣大諸部從。所受無盡眷屬無盡。於有情

中最極殊勝。亦復具足殊勝功能。自然具足六波羅蜜。所有功德經於淨梵四宮。具足念及正念方便願力智。亦是一切諸數義中。得無怖畏及能言說。無有愚癡句顯了。成大聰慧具有廣解。無懈怠心少欲知足。利益廣大情無愛著。即是一切有情殊勝所信之處。亦成恭敬師及上師。此人先所未聞工巧技藝神通一切教法。若文若義皆悉解了。戒及活命。最極諸行最極清淨微妙。出家及成近圓。不令忘失一切智智性大菩提心。決定不入聲聞羅漢緣覺乘中。持金剛金剛手。如是具足無量功德。亦有如是無量無邊廣大功德。持金剛金剛手。誦此真如真實名者。即是真實執持微妙丈夫者。聚集微妙福慧具足。一切正覺功德最極。速疾求故不經多時。能成真實究竟無上菩提。於多劫中不

入涅槃。為諸有情中多現無上妙法。十方世界中詮演妙法。大鼓之聲相續不盡。其聲哮吼為大法王。

唵薩末捺麻(一)啞末瓦(二)娑末瓦(三)比熟捺末日囉(二合四)啞啞啞(五)不囉(三合)吉帝巴利熟捺(六)薩麻捺馬(七)拽惡怛(八)薩末怛他遏怛(九)默捺葛野(十)曼祖悉哩巴梨說捺釘(十一)蒙巴怛影低阿(十二)唵薩末怛他遏怛訖哩捺野(十三)喝囉喝囉(十四)唵吽訖哩(十五)末遏鏗(十六)默捺蒙佐(十七)末機說囉(十八)摩訶鉢拶(十九)薩末捺麻遏捺(二十)阿麻辣續巴哩熟捺(二十一)捺麻惡哩捺葛囉(三合)末啞(二十二)

復次吉祥持金剛

懇分歡喜而合掌

如來尊者出有壞 敬禮究竟正覺已
復次尊者密自性 持金剛之金剛王
所餘種種同住處 高聲如是而白言
尊者我等亦隨喜 善哉善哉說善哉
為彼欲求解脫果 有情為無救度者
我等真實救度者 作護菩提大利益
宣說幻化微妙理 此是清淨微妙道
亦是甚深極廣大 大義有情作利益
一切正覺境界者 諸正覺等皆已說

出有壞妙吉祥智勇識。所誦真如之真實名。出有
壞世尊如來所說已畢。

三世諸佛真實說
此妙吉祥真實名
為護真實善根故
真實斷除諸煩惱
真實不解於方言
為妙吉祥真實名
見真實益捨是非
真實失義文倒處

諸祕密中真實王
真實無私而翻譯
一切有情皆真實
速成真實究竟佛
不應真實伸言詞
具不思議真實德
隨力真實而翻對
智者真實復正之

文殊師利發願經

東晉天竺三藏佛陀跋陀羅譯

身口意清淨	除滅諸垢穢	一心恭敬禮	十方三世佛
普賢願力故	悉睹見諸佛	一一如來所	一切剎塵禮
於一微塵中	見一切諸佛	菩薩眾圍遶	法界塵亦然
以眾妙音聲	宣揚諸最勝	無量功德海	不可得窮盡
以普賢行力	無上眾供具	供養於十方	三世一切佛
以妙香華鬘	種種諸伎樂	一切妙莊嚴	普供養諸佛
我以貪恚癡	造一切惡行	身口意不善	悔過悉除滅
一切眾生福	諸聲聞緣覺	菩薩及諸佛	功德悉隨喜

十方一切佛	初成等正覺	我今悉勸請	轉無上法輪
示現涅槃者	合掌恭敬請	住一切塵劫	安樂諸群生
我所集功德	迴向施眾生	究竟菩薩行	逮無上菩提
悉供養過去	現在十方佛	願未來世尊	速成菩提道
普莊嚴十方	一切諸佛刹	如來坐道場	菩薩眾充滿
令十方眾生	除滅諸煩惱	深解真實義	常得安樂住
我修菩薩行	成就宿命智	除滅一切障	永盡無有餘
悉遠離生死	諸魔煩惱業	猶日處虛空	蓮花不著水
遍行遊十方	教化諸群生	除滅惡道苦	具足菩薩行
雖隨順世間	不捨菩薩道	盡未來際劫	具修普賢行

若有同行者	願常集一處	身口意善業	皆悉令同等
若遇善知識	開示普賢行	於此菩薩所	親近常不離
常見一切佛	菩薩眾圍繞	盡未來際劫	悉恭敬供養
守護諸佛法	讚歎菩薩行	盡未來劫修	究竟普賢道
雖在生死中	具無盡功德	智慧巧方便	諸三昧解脫
一一微塵中	見不思議刹	於一一刹中	見不思議佛
見如是十方	一切世界海	一一世界海	悉見諸佛海
於一言音中	具一切妙音	一一妙音中	具足最勝音
甚深智慧力	入無盡妙音	轉三世諸佛	清淨正法輪
一切未來劫	悉能作一念	三世一切劫	悉為一念際

普賢菩薩名	三世諸佛行	清淨諸行海	嚴淨佛剎海	清淨善業力	功德力清淨	神力遍遊行	悉見未來佛	於一微塵中	一念中悉見
諸佛第一子	及無量大願	滿足諸願海	度脫眾生海	除滅煩惱力	智慧力無礙	大乘力普門	成道轉法輪	出三世淨剎	三世諸如來
我善根迴向	我皆悉具足	悉見諸佛海	分別諸業海	壞散諸魔力	三昧方便力	慈力覆一切	究竟佛事已	一切十方塵	亦普分別知
願悉與彼同	普賢行成佛	我於劫海行	窮盡智慧海	具普賢行力	速得菩提力	行力功德滿	示現入涅槃	莊嚴剎亦然	解脫及境界

身口意清淨	自在莊嚴刹	逮成等正覺	皆悉同普賢
如文殊師利	普賢菩薩行	我所有善根	迴向亦如是
三世諸如來	所歎迴向道	我迴向善根	成滿普賢行
願我命終時	除滅諸障礙	面見阿彌陀	往生安樂國
生彼佛國已	成滿諸大願	阿彌陀如來	現前授我記
嚴淨普賢行	滿足文殊願	盡未來際劫	究竟菩薩行

文殊師利發願經

